

齊州鐵庫

WT 221 / 1502

自敘

曩者兒子辟方輩將爲予文付之印版予尼之曰文之美惡自有定評吾文而可傳耶後世必有知我者其不然者徒爲覆瓿資耳奚事亟亟自炫粥爲兒輩聞吾言而止意固未釋然也它日朋好中又有以是勸者則仍以前說謝之蓋予夙所持論如此今歲春正月大病奄奄餘一息方疾革醫者什九言不治家人亦豫治絞衾斂物以及麻經布縷之屬垂絕矣二日而始甦予固不自知也越一月少間稍稍能起坐顧體中猶憊甚神志不甚清晰昏罔中每見兒輩將護之暇憧憧往來發予篋似爲予理舊稿者有時就榻前來問則或省或不省如是者又兩月餘比今夏四月亟起詢之則稿印者已十六七矣是稿前後年月顛倒錯亂紕謬之處所在而是蓋兒輩爲速成計隨寫隨印不足言文亦不能成集也無已姑以賸稿名之乙酉六月原煒

葑里賸稿卷一

鄞張原焯著

說織

吾鄉在邑西南曰黃古林方三十里地所產無遠物居民農力之外率賴織自澹給一歲之入駸駸四五百萬矣向嘗怪吾邑志乘言物產者不及席鄉之中夙以文著者若楊文懿聞莊簡張文定諸公集中軼無聞焉士好言高遠而忽于咫尺眉睫之近不其惑與暇日鮮事倣陸魯望耒耜經例作說織一首它日有作儻于是徵

凡織之屬用莞者十之七泉或麻十之三其器金之屬若干事竹與木之屬若干事織者多婦女稚弱男子亦間爲之日雞鳴起飭羣材使備自朝至於日昃夜辟纘盡一日用乃已纘以泉麻之屬謂之經其大者亦以莞謂之邊邊與經各有等席精者以苧麻或泉縷織者則否視其直爲繁殺凡織之器先樹機機以四木爲之從衡各二木令相等若井字然附于機

者曰杼杼有孔無數以貫經俗謂之扣竹屬鏤其一端以繫莞使可進退謂之于機杼者曰建建者榘也若琴瑟之有機杖榘杖之譌也機之外有刀所以斲也蓋織之器大較如此凡席之類最廣次四尺四其經六十又四謂之六四次經俗謂之六十亦曰五四數者之外有修十丈或二十丈日本震災彼邦人來者尤夥席之直最上者洋花一席直二類有雙草有單草單草直恆多而廣弗人坐相次其几可三面坐上下之恣所食其身用力勤者乃食四五人蓋吾鄉無甚貧富無庸作于外者斯其明效也

其平也范之欲其矢也縣之欲其體之翼也寸寸而度之欲其有等也其事至縹緗吾鄉人童而習焉不待學而後能夫席鄞產也遠方人稱曰寧席仍舊名也顧業是者獨吾鄉人詢之它鄞人則不知者十五六天下事之名不副實者大概然矣癸亥四月張原煒

洪承祁傳

承祁姓洪氏慈谿人自其少時父命之讀書旋讀旋棄去已而學爲賈所欲設施者絕偉旣成矣而中廢竟以死其死也無知與不知皆太息卽緒弗慊於承祁者未嘗不悼其不終也上海大都會夷夏輻輳賓旅闐闐奔走競機利者四面而集承祁幼從其父益三府君治燧引之術有心獲未一年而大喪其業會日本人覬滬市殷庶將有所規建陽揭通引壻鬻爲名陰欲以岡市利諸賈于扈者大嘩顧莫敢誰何承祁亟與鄉人虞和德謀募白金百萬版設所謂交易所者摺拄之交易所者會諸貨物質劑平亭之使有恆賈其制規自遠西人吾中夏弗經見也事旣舉諸賈咋嚙弗

能辦承祁爲其疏曉條舉之行之一年乃大效當是時江以南交口稱洪承祁矣承祁軀幹不及中人倔強負奇氣視世事無不可爲稠人廣座持論嶽嶽卽言弗衷於理亦委折能整厥詞性故伉直每與人爲錢通斥巨金弗吝惜自其旣得志益務爲恢廓不欲以曲俗咫尺自囿卒坐此致敗承祁以民國十一年二月二十八日卒年三十又三初益三府君之歿先承祁一年臨終以貲分屬諸子承祁奮然曰大人良苦願承祁不能局促作守家兒獨能善用財耳其自許如此

張原煒曰用財之大戒有二曰嗇曰貪雖然與其嗇也寧貪觀承祁之對其父意量亦偉矣畜志不遂旋隕其軀乃使操成敗之論者有所據以肆舌于其後夫噉噉者易缺而庸庸者常勝自古然矣

沈母夏淑人傳

曹錕之攘位也以重金龍國會網致兩議士俾來歸諸議士不能有躬拱手聽命者比比矣定海沈君椿年時在衆議院度勢不可如何獨跳身之

上海以免是役也僉多高椿年義椿年則曰斯吾母教也先是椿年蚤喪父事母以孝每事必諮而後行自一爲浙江諮議局議員二爲衆議院議員所至奉職兢兢無敢少失隊貽母羞賄選事與椿年既南下諸黨於曹者微知母以風病留京邸遣椿年鄉人某俛以醫至奉白金五千版爲母壽要風致椿年母正色曰吾兒戇幸獲免於小人彘者袁氏圖帝制吾浙疆吏嘗脅持諸所稱代表者上章奏勸進吾兒義不爲所辱獨此可人意耳今奈何其以貨市其明斷守大義如此母生有至性事母某太夫人相依至老不忍去某太夫人九十有六而終母年亦七十杖而大號哀毀過恆人用是致疾既終喪始就養椿年京邸風發不可止中遭政變母子相睽闊戚戚無驢欲南歸未得間於是曹黨誦禁嚴門以外邏者相屬然椿年卒用母計微行將母去之上海疾加殆以十四年某月日卒春秋七十有九母姓夏氏定海人歸同縣清封資議大夫諱用賓爲室生男子子三人椿年康年昌年女子子五人長適施某次張某三費某四涓清五毅涓

清毅皆守貞不字爲女學教師

張原煒曰叔世士大夫歸美親善好雜摭事實用炫夸人耳目嘩嘩然溢乎辭矣若椿年之母之賢椿年稱之定海人稱之諸自京中來者亦縷縷不去口此豈與汎引而鮮當者同乎哉椿年又言母嘗規建定海女學及沈氏族葬之阡皆奏私財飲成之茲不著著其繫義之辨者于篇

題郭氏宗譜後

郭氏原煒之外家也其先自某處遷白象橋在曰象橋者曰上郭在郭氏者曰下郭下郭族不甚緜有二支一支曰廿一房居祠之東北俗稱白裏村人一支曰十四房居祠北俗稱曰外村人向例宗祠有事裏村人主之外村人不與焉外村人卽身故無奉主人祠者外王父季蓉府君十四房所自出故亦未入祠向嘗怪裏村外村特居處之隔異耳顧或則入祠或乃不入祠自原煒幼時外王父及諸母舅先後淪逝營無所聞知少長每從外家諸長老試問其故以歲久疑莫能明往歲正月諸郭將有事於譜

牒出舊譜見示命原煒任纂修之役原煒謹誦讀之乃知裏村外村其始固同出一系外村人所以不入祠者意將有所待也先是郭氏始遷祖曰某某公名軼不可得徵生五子是爲恭寬信敏惠五房此五房者恭敏惠三房或遠徙他方或中絕今所存者獨寬信二房耳廿一房者信房之祖之所自出其寬房一派向稱十四房二房同系彰彰明矣已而十四房貧甚獨廿一房有饒貲故祠宇之規設諸材費率取于廿一房而十四房不與焉大抵古時俗淳厚其人多良愿尙廉恥十四房之先嘗欲有所輸于公以力絀不能給故外村人人祠之議寧隱忍濡滯以有待非有親疏遠近之殊別也原煒曩聞先輩言郭氏之先嘗榜其門曰廿一房子姓亦未嘗有歧視之心可知原煒既考諸譜徵諸宗老言乃再拜頓首以請曰譜之作宗祠之設所以合和族姓崇一本之親也今吾外王父之所自出及寬信二房之同出一系亦既信而有徵自遷居以來迄於今茲裏村與外村喜相慶急相救疾病相扶持歲時餽遺相過從非一日矣邇者十四房

之先以材費未集故不敢奉主人祠誠慎之也夫合者可以分則分者必可復合今時移勢易若任其分而不復合非所以安先靈詔後嗣也且郭氏之譜草創自前清光緒間其闕疑失考者相屬今以外村人未入祠使諸郭不相統一族有公事多不得同它日遲之又久將使裏村外村後人疑爲兩宗詎非可憾者與諸宗老皆曰諾於是原煒歸告以吾母從母及大舅之後人設祭饗堂以尉吾外王父母之靈俟它日譜成謹奉外王父母諸舅諸舅母及外王父以上祖若父若祖妣諸主位於郭氏之祠祭之明日歸爲之記謹書譜末以告于後之人十五年十月外孫張原煒

總理紀念碑文代

維民國十有八年六月一日恭值總理奉安大典是役也起北平訖浦口迤邐達二千餘里輦轂所經供張設護惟本路主辦爲多先期同人等奉令將事奔走後先業業兢兢罔敢差忒又以曠代盛舉罕有比倫將樹碑於路局花園用昭來許謀議孔協材費具興五月十日某某謹率僚屬行

奠基禮於時風日朗清萬衆肅集禮儀孔備有脊有倫嗚呼懿矣民國肇建十有八載軍閥宰割波譎而雲興自前年六月北伐幸底於成環顧內爭迄靡寧息然卒從艱難顛苦之餘獲有寰宇救平之一日並時山東濟案旋亦解決南北通軌若履坦夷用能使駐蹕無驚山陵永奠自非總理在天之靈默相上下烏足以臻此夫飲水則思源當食則思祭人情然已吾人遭際共和沐浴教澤平日一飲食之微一跬步行動之頃猶當念念弗敢弭忘况又躬與光儀式憑靈爽臨之在上質之在旁乎抑某某又有進者所貴乎紀念非徒侈觀瞻尙形式已也其在書曰念茲在茲心所專繫謂之念垂之簡冊謂之紀吾同人誠念茲在茲莫若以總理遺教爲依歸於斯碑猶其末耳曩在民國初元總理對民立報記者之言曰交通爲實業之母鐵路又爲交通之母國家之貧富於鐵道之多少定之地方之貧富於鐵道之遠近觀之大哉至言其繫念鐵路事業至深且著可以垂百世而不惑矣又讀總理實業計劃謂南京對岸之浦口將來爲大計劃

中長江以北一切鐵路之大終點是則浦口地位之重要夙爲總理所垂念明甚首都改築以後路局南移浦口南京相隔僅一衣帶水賓旅之往來商貨之輸集駁駁乎增益矣某承乏路政自今以往敢不勉自策勵本總理無畏之精神以完成十萬英里鐵路爲職志尤願全路同人匡之翼之以愛路者愛黨愛國一心一德俾底於成庶幾哉紀念之真義於是乎在嗚呼總理不死人有恆言過斯碑而猶不知感奮興涕者直自外於吾中華民國之人也已

中華民國十有八年奉化孫某

奉化趙府君神龕記

今年三月十日奉化人士將奉其鄉先輩趙平之府君木主位於縣之先正祠於是君之歿十有七年矣先期鄞縣長東光陳侯輩都十二人相與咨議於衆曰君以故清名孝廉生際末葉銳欲有所革更嘗于所居鄉昌設爲鄉校曰剡源中學又躬先截髮爲子弟帥句甬舊邦俗故僊壑奉化

一辟縣十數年來文化欣欣稱極盛微君疇有此古稱有功德于民則祀之於君之祀宜爲記乃屬鄞張原煒文之以辭君以光緒壬寅舉于鄉於予爲同年生其明年公車北上赴禮部試會清都新擾攘詔權用河南試院君以道梗滯至上海約予與俱始發上海溯江達於漢汽車行發大智門至信陽州二日乃達既達更驟子車又十有五日抵開封是役也同行者鄉人十數輩行益蹇談接益頻君與予同耆飲夜棲逆旅中風沙被面市村醪相醕酌每中酒感發願謂予今時事日益棘清帝及帝后挾大物以犇民棄之矣其能國乎又言科舉桎梏人如束濕薪姑俟之吾儕要當規其大耳時清廷訶司革命黨文網嚴士旦夕思懼謹用周謹委宛自容免予耳君言大駭遽然意知其非常人也日月不居人事嬗易予方講授郡庠君則之松陽訓導任兩人蹤跡不台併者有年居亡何有自君鄉來者走叩之則君之廣州矣廣州時新建府諸豪杰四面至誓揭櫫正義覆清廷君既至任候補參議院議員駸駸用於世矣越半年乃病病至上海

遂歿烏庫以君所懷蓄戀令假以年壽其成就詎出黨國羣彥下天不降
祚戮我良人生不竟厥施物而困於客死是則滋可喟已君幼劬學從父
讀父教敕嚴漏下恆三四弗得寢君母卽垂泣止之讀如故自其年少十
三經琅琅上口矣既成諸生雅不意爲帖括文治經史輿地諸有用之學
至刻厲德清俞樾定海黃以周慈谿馮一梅諸名宿見君作大擊賞及舉
于鄉官教職旋晉直隸州州同非其志也聞竺紹康秋瑾方在紹興規設
大通師範學校招致四方奇才異士亟大喜往約與共事紹康瑾亦傾納
君在校若十年朝夕講武期大舉四方士多附之蓋鄉者予以非常人擬
之至是而驗矣君諱文衡字平之世居奉化剡源鄉兄弟五人今第七特
區行政督察專員趙公甲之其李弟也公峭直爲官務實踐所至吾浙黃
岩吳興嵊諸縣及山東之泗安廣西之隆安聲施爛然矣然公嘗自言吾
不逮伯兄遠甚君之歿年五十有八歿後十一年爲共和十有五年蔣公
介石總帥十麾戈北指大字蕩夷君之鄉人隸戎行用材武發蹶者比比

是談者推究其朔未嘗不歸美君烏虜人生百年奚判俄頃形壽者有時而盡其不盡者獨此歿世不磨滅之名耳如吾趙君者願曷嘗死哉二十二年三月張原燁

葫蘆島楊翁述

始予以事至定海泛舟沈家門與其地賢士大夫習彼中人往往交口稱楊翁其瑰奇磊落多可喜者今歲六月聞翁病歿矣於是翁之鄉人劉君寄亭張君曉耕縷舉翁行誼屬爲述述曰翁姓楊氏諱某某杏村其字其先閩之某縣人方其少時隨乃父某某府君賈游沈家門已乃于其地設爲肆肆曰合順用粥飯蠶蕘諸海物起於市凡十有餘年久之業駸饒先後營設諸肆凡爲漁棧者三曰合順曰合源曰協順爲錢肆者四曰寶順曰順餘曰寶泰曰順泰爲米肆者一曰乾順肆以八九數而楊合順資歷久尤有聲翁始居葫蘆島與沈家門隔一水相望其地寫絕便於漁居民十百家纍纍皆漁舍春夏之交漁者以時往之海若錢若米若薪炭漆梟

之屬諸所須率取給於翁它日漁事既畢載所獲以歸歸則具大酒肥肉要翁蒞其家爲翁上壽翁爲一一具尉勞之皆頓首曰謝楊老之賜老者島中人尊稱也自楊老名漸著久之環沈家門諸島無不老翁者見之不稱名翁待人坦坦不爲城府無卑賤賢不肖悉羅致之尤卑下尤敬與鈞其在沈家門設肆衆有以喪業叩者量所宜役使之卽甚困厄無聊賴得翁一援濟靡不帖帖就規範久之且優遊豐給矣翁居鄉行善最著者福建同鄉會八閩會館其它若興學若修繕道路津梁若建燈塔不可殫紀某年某月前浙江省長伊通齊公有利濟功多之褒子二德慶陸陸女五孫男五曾孫男二翁歿年六十有三共和廿三年甲戌六月某日也

張原煒曰予聞曉畊言葫蘆島臨大海中兩山間夾爲甕甕偪歛若甕口駕小舟屢可達既達乃見平原港流人物之饒宛然一天地斯溟渤之奇觀矣翁之豪若爲發之翁嘗領沈家門商會矣持會務若干年所設施斬斬在人然於翁特小試耳史稱項梁微時居會稽嘗爲人主辦自古豪杰

常有以表見如此吾是以益穆然想見翁之爲人也

存濟醫院張子良太翁功德碑

海通而還科學駁昌盛人盡知醫術宜效法遠西醫院之設徧國中矣沈家門者舟山羣島之一居毗環島而棲者以萬數緜者嘗規造存濟醫院其地曰天后宮山院當山顛與島民邨落相望中互山徑島之人卽有病非紆道無由致以故不幸而病病而失時以至不可救者什九而有夫病猶火也火之起星星耳救之不及其時則星星者燎原不可嚮邇矣先是島有耆碩張翁子良嘗欲鑿山通道以便病者山故陳氏產翁旣諮于主者未得請坐是中輟不果行今歲某月翁之年七十矣厥嗣澹人將爲其父壽翁固固不之許旣而曰若果壽我者盍自吾島醫院始澹人旣奉翁命諮於衆申前議斬廓而大之主者陳姓亦願署券割地飲之公時則諸與澹人遊者皆樂觀厥成旬日之間釀白金得五千版澹人又奉翁命益私財如釀金之數財費旣集次第具舉自邨抵院爲石磴磴五十有餘級

又闢治院舍二十有餘楹蓋白山徑既通而島民無涉跋之苦無失時不可救之病醫院規制駸乎大備矣院既成島之人交口稱太翁謂不可無以紀厥盛乃謁予爲之文是用最其都凡揭之院壁以諗來者以垂於無竟翁名某某子良其字澹人字曉畊共和二十年某月

定海縣公安局沈家門分局長奉化王君去思碑

定環島而縣島大者沈家門其地饒魚鹽其俗剽悍其人民族類至不齊若台若滬若閩諸幫漁民四面而集春夏汛期至者十萬計居民無鄉里親平時夙不相習稍一齟齬則挾衆操白刃爲私鬪紛起糾結猝不可爬櫛故官其地者獨難君以二十年二月量移蒞治始至詢得大猾盧忠道橫恣不軌狀窮治之盧有黨徒聲氣通遠近甚盛令既下或爲君危者君不之動卒收捕下之理盧尋畏罪自殊諸黨羽聞之啣君甚控于上官有某委員者奉檄來至則故張其詞欲以重辟陷君久之微露索賂意君徐起謝曰公休矣功與罪有律在焉有王雪塘而以賂免者乎雪塘者君字

也君官斯土久威稜益著匪目李裕生周阿才等六七人先後獲案自是盜漸戢島民以父君廉正待人以誠島中人卽有事變君至立解先是島民既繁則日聚諸無賴爲樗博及鴉片烟諸戲白晝行閭里視官司禁令若贅旒官斯土者陽託積重不易返之名陰實坐視朋比以自肥君在官三年一介不取于民布衣蔬食取足自贍去之日囊無餘錢里中父老爭釀資完其逋漁民無知不知皆呼曰王青天君名永華字雪塘浙江象山人嗚呼俗益漓詐僞亦滋甚官吏之將送士庶之揄揚幾爲通常醜醉之具文若君者處潤而不以自肥居卑而不以職責諉之人其繫人思有自來矣碑以壽之亦見公論之不泯而百世之後得失之自有所在也乙亥六月張原煒

楊枝觀音石象記

今年六月廿又八日原煒偕湯生閻韓生襄周張生蟄泛舟蓮花洋登普陀山宿楊枝禪院凡六日楊枝禪院者以舊有楊枝大士石象得名世所

傳謂從海潮涌出者也予既至其地亟訪求其遺蹟果有石刻在寺壁間
年久矣從塵翳中拂拭之乃稍稍能辨識大士像刻工精絕寶蓋瓔珞手
執楊枝高一丈三尺寬八尺左右兩旁皆有刻文詳記刻石者姓名及年
月蓋是院舊有唐閣立本所繪石像繼乃燬于火及萬曆三十六年寧紹
參將劉炳文興造之又重刻是象其大較具見劉君所撰象贊中惟不知
初刻是象者何人先時所置何處其時代相距若何普陀山志記載弗詳

山志稱楊枝庵明萬曆年間劉炳文建今據象贊有
重刻字樣是楊枝庵不自明始有劉君特重建之耳

叩之寺僧茫不能道其顛末自來文人

墨客游履所至大率以耳爲目侈陳景光言普陀名勝者見於志十有二
而茲石不與焉凡物之顯晦詎非有幸不幸歟自劉君刻石後更歷三朝
清初黃毛之變諸寺觀無一存者茲石之遷變不知凡幾既命寺僧根心
摹拓若干本以廣其傳又錄其贊文於後後有游者庶幾覽觀焉共和十
有三年歲次甲子鄞張原煒

附劉君象贊原文都九行每行十二字

重刻普陀大士像

普陀聖像摹自闍公一時妙墨百代欽崇迄今寺燬石付祖龍廟貌鼎建瞻對無從旁搜遺迹鑄以新工嗟嗟無色無相佛性本空色色相相佛教斯弘用期世世奉茲靡窮

明萬歷戊申寧紹參將劉炳文立石于普陀山之楊枝菴

按此贊在象右端其中部有唐闍立本書五字另一行刻武林孫良鑄五字在碑下端

普陀山楊枝觀音刻象神龕記

予既與夏君石橋月珊從楊枝禪院塵壁間訪得石刻觀音大士象以古物之重見搜求之不易易將設爲神龕以示後之人蓋是刻石象舊傳從海潮中得之或又神其說謂有諸佛菩薩擁護以出云云其語荒怪多不經大抵潮汐遷徙靡有定所茲石文理光緻殆非人工其爲海水歛欲而成中經沈霾而復出無疑又普陀山志載楊枝菴明萬歷間造予攷寧紹

參將劉君炳文所撰象贊亦以萬歷戊申記年而標題則稱重刻大士象云云曰重刻則斯院之造非始自萬歷間審矣且是院以楊枝名以大士象手執楊枝故也普陀山志顧不及此其陋可知佛象舊出唐闍立本手筆當時初刻者何人所設置何處亦既湮軼無徵矣自劉君重刻以後中經兵燹之災不知凡幾茲石顯而復晦晦而復顯幸尙能流落人間謂非神靈之所呵護諸山僧衆之所宜葆守者耶自予與夏君謀設神龕越二月夏君遽卽世人事卒卒逡巡未果一日語慈谿裘昌如光熾裘君曰斯不可以緩予旣喜前諾之獲踐與舊物之得所馮依因命院僧根心拓地爲龕爲此記付之俟它日龕成勒石其左是龕也裘君昌如輸獨多贊其役者杭州方佩紳敬輿定海湯說倩閩韓湘舟襄周張曉耕澹人劉寄亭德裕黃遂方毅費夢周侃張靜盪蟄厲雪帆林承業也乙丑正月張原煒翁厚父墓碣

今年夏五月予在杭州聞友人翁厚父以疾歿逾月歸造哭其家孤子文

瀾泣告君當日死狀語甚悲先是君自京師謁其兄歸一日方舉酒自云小卻夜二鼓呼腹痛劇甚遂以卒質明舉者奉尸尸出戶母夫人噉然哭於房當是時絕久矣尸目忽張家人環視之良久乃瞑及歛母號走撫尸張如初烏虜人孰無死唯君死而恫加甚焉可隱也君諱傳泗鄞翁氏父曰某某官生二子而君爲季其卒以民國九年五月某日年四十又三越三月文淵葬君某原子七人某某妻錢氏君生平未始求仕進所居辟精室蒔花棖鳥澹焉自娛嬖性嗜酒客至輒要之飲頽溫溫然醉後滋益恭事兄敬教子義接戚屬朋友以誠其大較若此始予將之杭州先期走別君會君謀人都方戒裝意遲遲有難色予謂君今南北同軌朝發而夕至何難爲君悄然曰母老矣兄行役夙夜吾何以行耶嗚呼君之不欲行以有母也今母在而君曷爲死哉民國九年歲在庚申六月

蕭山朱母銘

吾友朱鼎煦有賢母曰湯夫人以瘍發於背卒卒之日家內外無老少卑

賤哭之皆失聲有族子某曰自我嬰錮疾寡乏無以自給餽粥飲食唯母是須今亡矣夫又有老嫗來哭曰我曩者庸于母未嘗見大聲疾色卽有缺失母則爲彌蓋之或委曲風諭使悛改其過人唯恐傷詎意其雖斯疾也蓋鼎煦言如此俗益漓婦德尤不修鼎煦之述其親皆門內肅行匪有瑰特可驚人者然母之賢可以風矣夫人蕭山湯氏年十七歸同縣朱君朱君治舉子業中歲以後始棄書服農家事有無一以委夫人日辨色與入爨下治酒漿具數十人食日旰矣猶姃姃不少休農功以外旁逮蠶事植桑繅繭歲有贍贏敏于事嫻于禮事舅姑翼翼如也教率諸子秩秩如也於娣姒姻鄰愉愉如也婢媪猶猶如也其卒以二年十一月某日其春秋五十又七其男子子四某某其女子子如其男其孫若干鼎煦賢而有文與予善朱氏之興將于是乎在銘曰

嗟猗夫人令聞有淑父曰永昌夫曰穉谷不顯于時曰維在後祁祁令子學行清懋婦功之修母道之行儀刑鄉國朱宗以興有幽新室在蕭之陽

我作銘詞終焉此藏

故清縣學附貢生范君墓志銘

君諱賡治字文虎晚年自署息淵鄆范氏先世居襄陽鄧城當宋宣和間有諱宗尹者官觀文殿大學士隨高宗駐蹕臨安其子公麟贊魏丞相杞女弟遂家於鄆是爲范氏遷鄆之祖曾祖懋忠祖上庠考邦周君自少超悟善讀書弱冠成縣學生負嘗試於鄉矣一不售卽棄所業以去去則遁而之醫先是邦周府君習醫家言嘗以皇古聖哲諸方書及所獲睹祕笈授君君少承庭誥日月濡漸既輟讀治醫學益劬覃孳今古輔以心解久之遂通其故其爲醫不主一家言尤不喜襲時下陋習與人切脈若疏闊無所事事及處方君佐分齊精析剖豪黍諸言醫者望之率斂手謝弗逮衡決人生死多奇驗嘗言某某必弗活某某疾雖劇亡慮也已而果然人有要致者慮病者或聞知每多諱言聞君質直無少隱意不能無鞅鞅卒乃服君先見也資性通敏機應如流耳聽手治齊時並營恢恢若有餘自

醫名噪於市遠近求療治者四面至生徒詣門下問益無慮數十百人日
黎明興堂皇據高案令諸生徒背誦所習書琅琅滿室中於時病者方環
集君則爲之處方問寒耶熱耶諸生徒伺君宥背誦或脫漏一二字君則
從其後扑之且扑且詈詈已卽又爲處方如是者以爲常其精力過絕人
如此君起自寒峻旣粥醫歲所入倍恆醫顧未嘗計封殖平居務周人之
急尤貧乏者拯之尤備至爲人嬰招視其家壁立即卻酬徑出門去親好
有求貸者直君窮空則探囊頻燈約以明日來明日其人來傾一日中所
獲飲之以是粥醫數十年家無餘貲雅好蒐集古金石書畫間亦爲詩詩
多稱性之言不事鐫繩往往有獨到語與慈谿馮君木并交至驢每出所
作示馮君馮君謂君一生沈浸情好中匪獨於詩已也醫稿什九隨棄去
歿後子禾哀其存者爲十二卷藏之顏曰激清堂遺稿以丙子七月二十
七日卒于家春秋六十有七配氏陳氏王子二禾令女二君旣卒之二年
禾葬君縣西芙蓉山之麓先期來乞銘銘曰

桃源之水西山之陽山蒼蒼水泱泱有狂生者於是為臧後有過者保茲封樹毋毀傷

六九自述訓兒孫文代

我生之初以同治甲戌自是而光緒而宣統更嬗三朝以迄於今茲此數十寒暑中滄也而桑桑也而滄計吾童時之游釣嬉戲少壯之衣食奔走猶歷歷在眼前而吾年則既六十有九矣先哲有言前事不忘後事之師念吾有生來焦勞况瘁亦云備至及今未之忘也將欲使後之人有所徵信不可以無述吾李氏世居永嘉之柑溪家故鮮恆產又不幸早喪父無親戚故舊之援助年十三始賃廩城中南門街自設履肆業織而穫微吾家人以衣以食咸取給焉時吾母方健存予與吾妻胡蚤夜勤儉作入事親出治雜事而吾妻劬苦尤甚日井汲庖湔澣濯縫紉以外為吾共緝履日孳漬麻桌為縷有恆程久之兩指間皆皸繭嚴冬凍裂血漬往往滿衣襟及吾妻先後生男子子二人女子子三人食指冗繁益無以繼嘗別營

它業矣營輒控躡計無可如何賴舉債延喘息居數年債益集困益不振夫婦中夜相對泣不得已則議以女媵於張張故擁高貲道巾船若干艘往來長江下游所至鎮江南通諸郡會粥轉有無則以吾文兒屬焉蓋自此文兒依於張者十有餘年嗟乎人情孰不爲兒女計今也有女而爲人媵有子弗能終讀依人役勞予之內疚可知已頃歲以還予與吾妻率兒輩勤操作積銖累邀天之佑差不瀕於凍餒文兒娶於邱亦旣生孫男女五人曰祖繩祖武祖光曰芬曰霞孚兒之婦祭方新來歸一門以內洩洩融融嫁婚粗完家室團聚吾夫婦二人白首偕老無災無病自此長齋禮佛以遂餘年清夜捫心造物之所以旣我者亦云厚矣顧吾一念疇曩則有不能不爲而輩告者茲值垂七之年揭櫫往事列家誠都爲四條著之左方懸之家塾後之子孫庶覽觀焉

一曰家室宜正也夫婦居室人之大倫今之豪家著姓往往廣置姬侍其始也謀以自奉其卒也乃以自纏縛泊乎話評交謫嗃嗃嘻嘻俯仰無容

語笑皆罪悔吝隨之由來漸矣向者張氏之納吾女待之未嘗不渥同居未嘗不歡顧曾不數稔抑鬱以殂前車之覆可爲殷鑑乃今而後汝曹其戒之哉一曰兄弟宜籍別以居也人之材性各有不同譬如食飲嗜好酸鹹不能強人之舌以從我其於兄弟何獨不然厥在古昔舉倫常盛事有侈言數世同堂者矣外則愛敬其名陰則二三其德華而不實義何取焉吾家自今著爲例子姓一授家室便令異居所以策自立弭內閔道在是矣一曰財利宜依散也人之積財將以爲兒女計不知後人而賢無所賴於吾財其不賢也則滋足以爲累每見紈袴子弟憑藉先蔭坐擁高樓鮮衣美食忘由所來不事生產一旦由苑而枯由豐而嗇其痛楚乃較甚若斯者非獨子弟之過抑亦父兄累之夫欲求無累必自積而能散始矣一曰親戚宜欵助也人之有貸於我必逆計我之不彼却而始覲顏以相求否則計無復之急不暇擇者也以吾之羨濟人之乏於事爲至允於此而存沾恩市惠之念亦適見其隘矣以予數十年之所見所聞天下事因果

至顯如響斯應今日貸我明日必于我償蓋有不期然而然者念吾往昔舉債時或旬日爲期或以月期期將至惴惴懼無以當債家意何其喜怒甘其說辭或不繼則又展轉請貸以彌益之至今思之毛髮猶悚此汝曹所宜知也

綜是四端皆立身保家之大要也今人談身世往往諱其所自出以起家貧困爲詬恥予獨以爲不然書曰憂患所以興邦逸豫所以喪身卽貧困亦何害哉汝曹念之高官厚祿所以醜螫汝者也冰霜風雪所以玉成汝者也予老矣所望於吾家子孫者不在貴累之饒羨而在門第之清白不在利己以損人而在哀多以益寡勉之哉由是而力行之誦吾之言體吾之意世世子孫著爲例以則以守以弼吾家丕丕基保世滋大無逾於此矣歲在玄默敦牂律中蕤賓之月六九老人李秀庭述

右文一篇由予述意其潤飾詞句則張君子相爲之并請張君別寫兩通付文孚兩兒分懸之永爲家誡是文之作意在明白淺顯昭示來茲

至稱曰壽言則非吾意也秀庭又記

故儒馮府君墓表

廿餘年來吾縣人興設學校放放稱極盛矣嘗推究其朔則馮君止凡之勞爲多馮君諱丙然字子藩止凡其號鄞之人無知與不知多尊曰子藩先生方清季科舉未廢士恆於舊習次且不敢言革更拘虛目儒視學堂與洋教等夷新學坐是梗塞勿通流君居縣西南舊有家塾一所既憤凡民不可與圖始儼然排衆議更塾制爲小學手訂章制如十條用新學灌漑後進已又廢縣之鄞山書院爲鄞縣高等小學暮年績大著鄉遠近聞風踵起頗稍稍知興學矣君主辦學校待諸生徒一以至誠相處如家人父子驩卽桀梗不帥教者聞君至卽帖帖翁化自長鄞縣高等小學及寧波府女學堂寧波府中學堂先後都六七年諸生徒出君門下者迄今猶縷縷道君軼事也生平崇尚實踐諸所任事必罄心力赴之皆任寧波府教育會鄞縣教育會會長鄞縣勸學所總董及浙江會議廳參議鄞縣議

會會長皆可稱者君廣穎修冉外貌冲穆而中實湛然未嘗臧不人物于人之賢不肖辨析獨情不喜爲運命神怪之說當事無順逆夷然坦然仲子浦自美利堅游學歸駸駸將大用矣日者患肺炎咯血以死君若不以介懷其鎮攝多類此者以今年二月九日卒卒之前一夕呼家人處分家事訖願語從弟俊翰曰吾昨夢遊白雲寺知前身乃寺僧也又曰白雲寺在近邨馬湖吾曩時夢中數數過之嘗見有老者跌坐其中頃者問所遇老者乃起迎我我不當大歸耶越日日晡怛化坐逝俊翰謂予君平居口不及僧佛故聞者引爲大詫君配氏邵子二浩浦係三人予聞之俊翰君晚歲家居時時自祈死卽疾病家人以藥物進拒勿納蓋君夙具濟世利物之志遭際亂離抑抑不竟厥施其所死固宜夫死常事耳君又求死而得死復何有遺憾者願獨如吾鄉典刑何哉民國十九年五月